



Parlamento di Aruba
Fraccion di PPA

Na: Presidente di Parlamento di Aruba
Sr. Alfred M. Sneek
L.G. Smith Blvd. 72
Oranjestad, Aruba

STATEN VAN ARUBA
Ingek: 07 APR 2025
Volgnr: IS/490/24-25

Oranjestad, 7 april 2025

Topico: Pregunta na minister di Finansa, Economia y Sector Primario.

Honorabel Señor Presidente,


Como miembro di Parlamento di Aruba y lider di fraccion di PPA, mi persona, via nos Presidente di Parlamento, ta haci pregunta na su excelencia sr. Geoffrey Wever Minister di Finansa, Economia y Sector Primario. Esaki ta basa riba Constitucion di Aruba articulo III.17 y Reglamento di Ordo di Parlamento articulo 59.

E preguntanan ta tocante e situacion geopolitico y su impacto riba Aruba. Adhunto, honorabel presidente ta haya e carta cu un splicacion cortico mas e preguntanan.

Conforme Reglamento di Ordo di Parlamento articulo 59 inciso 4 y e urgencia di e topico mi persona ta desea di ricibi e contestanan mas prontoposibel sea, verbalmente durante e siguiente "vragenuur" of por escrito.

Mi kier a gradici honorabel presidente di antemano pa por manda e preguntanan na e minsternan.

Atentamente,



Sr. Otmar Oduber
Lider di Fraccion P.P.A.

Anexo: Carta cu splicacion y preguntanan na minister



Parlamento di Aruba Fraccion di PPA

Na Minister di Finansa, Economia y Sector Primario
Sr. Geoffrey Wever
L.G. Smith Blvd. 76
Oranjestad, Aruba

Oranjestad, 7 april 2025

Topico: Pregunta tocante e situacion geopolitico y su impacto riba Aruba.

Su Excelencia,

Diaranson 2 di april 2025 Presidente di Merca Sr. Donald Trump a anuncia cierto cambianan pa loke ta trata nan "Tariffs plan". Desde 5 di april proximo e cambianan aki lo ta vigente¹.

Segun World Economic Forum e cambianan aki tin implicacion severo mundialmente. E cambianan imponi pa Merca por conduci na aumento di obstaculonan comercial y fragmentacion economico cu por conduci na un recesion mundial prolonga².

Mester considera cu Gabinete AVP-FUTURO, pa medio di e Programa di Gobernacion 2025-2028, ta boga pa Aruba tin un crecemento y desaroyo economico inclusivo pa logra un reparticion mas husto di entrada y beneficio di e desaroyo economico di Aruba pa tur hende. Esaki ta forma e fundeshi di e maneho economico³.

Den e programa di Entrevista di Dia na Hits 100FM dia 3 di april 2025 e representante di Comerciantenan Uni di Aruba (CUA) a declara cu e cambianan aki por nifica un aumento di prijs di importacion di productonan entre 5 pa 15%.

Aruba ta un isla cu ta depende casi completamente riba importacion di productonan esencial manera cuminda (comestibel), combustibel, productonan fabrica y otro productonan, e situacion aki lo tin un efecto grandi riba e prijsnan pa nos negoshinan local y consecuentemente riba e consumidonan na Aruba. Banda di esaki nos tin e situacion di BBO na frontera y e aspecto acumulativo di BBO cu lo haci e situacion ainda mas grave. E

¹ [www.whitehouse.gov:](https://www.whitehouse.gov/fact-sheets/2025/04/fact-sheet-president-donald-j-trump-declares-national-emergency-to-increase-our-competitive-edge-protect-our-sovereignty-and-strengthen-our-national-and-economic-security/#:~:text=Using%20his%20EPA%20authority%2C%20President,at%2012%3A01%20a.m.%20EDT.)

<https://www.whitehouse.gov/fact-sheets/2025/04/fact-sheet-president-donald-j-trump-declares-national-emergency-to-increase-our-competitive-edge-protect-our-sovereignty-and-strengthen-our-national-and-economic-security/#:~:text=Using%20his%20EPA%20authority%2C%20President,at%2012%3A01%20a.m.%20EDT.>

² [www.weforum.org:](https://www.weforum.org/stories/2024/11/rethinking-trade-cooperation-navigate-global-shocks/#:~:text=The%20severe%20implications%20of%20failure&will%20be%20severe-.Rising%20trade%20barriers%20and%20economic%20fragmentation,to%20a%20prolonged%20global%20recession.)

<https://www.weforum.org/stories/2024/11/rethinking-trade-cooperation-navigate-global-shocks/#:~:text=The%20severe%20implications%20of%20failure&will%20be%20severe-.Rising%20trade%20barriers%20and%20economic%20fragmentation,to%20a%20prolonged%20global%20recession.>

³ Programa di Gobernacion 2025-2028 pag. 33-43



Parlamento di Aruba Fraccion di PPA

cambianan aki mas e situacion fiscal di Aruba lo tin un impacto negativo particularmente riba e **costo di bida** di nos ciudadanonan.

Hende di tur parti mundo por descurasha pa biaha internacionalmente. Consecuentemente e situacion aki lo tin su efecto devastador riba nos unico pilar economico cu ta turismo.

Aruba su relacion di comercio cu Merca y Union Europeo ta crucial pa e pueblo Arubano. Su excelencia tambe ta di acuerdo cu e ponencia aki⁴. Pues, esaki ta nifica cu e cambianan imponi pa Merca por tin un repercusion significativo riba e comercio local.

E desaroyo aki tin fraccion di PPA hopi preocupa ya cu e situacion geopolitico lo tin un resultado contradictorio y opuesto na e metanan economico stipula den e Programa di Gobernacion 2025-2028⁵. Fraccion di PPA ta preocupa pasobra Merca cu ta un di e paisnan cu tin un rol sumamente importante y crucial pa loke ta trata turismo, inversion y comercio.

A base di e splicacion aki mi persona como miembro di parlamento tin e siguiente preguntanan na e ministernan di Gabinete AVP-FUTURO

- Con Gobierno di Aruba, specialmente Minister di Finansa, Economia y Sector Primario, ta anticipa riba e noticia di 2 di april 2025, pa loke ta trata e efecto cu esaki tin riba e costo di bida di e ciudadano en general y particularmente riba un posibel aumento di prijs riba productonan esencial (manera comestibel), combustibel (gas, gasoline, diesel, etc.) y otro productonan, pero tambe posibel aumento di prijs riba servicionan, manera di awa y coriente?
- Gobierno di Aruba tin informacion di e efectonan cu esaki por tin riba e economia di e paisnan cu ta importante pa Aruba su comercio?
- Ki instrumento Gobierno di Aruba lo uza pa midi (investiga) e efectonan cu e implementacion (desde 5 di april 2025) di e "Tariffs plan" aki tin, riba costo di bida di nos ciudadano (inflacion), impacto riba nos turismo y comercio, pues e sector economico na Aruba? Con y pa ki tempo lo haci esaki?
- Ki instrumento Gobierno di Aruba lo uza pa midi (investiga) e efectonan cu e implementacion (desde 5 di april 2025) di e "Tariffs plan" aki tin riba e relacion di comercio entre Aruba y e partnernan principal di Union Europeo y Merca? Con y pa ki tempo lo haci esaki?

⁴ [www.government.nl:https://www.government.nl/latest/weblogs/the-work-of-the-ministry-of-foreign-affairs/2024/mutual-ties-between-aruba-and-the-united-states-contribute-to-economic-stability-and-regional-influence](https://www.government.nl/latest/weblogs/the-work-of-the-ministry-of-foreign-affairs/2024/mutual-ties-between-aruba-and-the-united-states-contribute-to-economic-stability-and-regional-influence)

⁵ Consulta footnote 3



Parlamento di Aruba Fraccion di PPA

- Si tene cuenta cu tur e efectonan cu esaki por tin riba Aruba su economia y cu esaki por tin efectonan tambe riba otro sectornan manera salubridad publico: Ki estudio Gobierno di Aruba lo ehecuta pa sa ki efecto esaki lo por tin riba presupuesto di AZV y hospital y con lo atende cu e efecto aki?
- Ki intervencion concreto Gobierno di Aruba ta considera pa efectua pa mitiga posibel aumento di costo riba importacion pa e negoshinan di Aruba y consecuentemente mitiga tambe e aumento di costo di bida pa e consumidornan?
- Basa riba investigacion di Gobierno di Aruba: Tin un plan di contingencia pa atende cu un posibel recesion mundial prolonga y con e plan aki lo sostene Aruba su economia en general? Con lo anda y mitiga posibel efecto negativo riba e entrada di pais Aruba calcula den e presupuesto 2025?
- Ki strategia Gobierno di Aruba lo implementa pa sigura estabilidad financiero enfrentando un volatilidad creciente den e economia global?
- Si tene cuenta cu BBO na frontera y e parti acumulativo di BBO cu lo nifica aumento di e productonan y servicio na Aruba: Ki plan di contingencia Gobierno di Aruba tin pa alivia un probabel aumento di prijs di comestibel (carni, galiña, ect), combustibel (gas, gasoline, etc), awa y coriente cu tin un influencia riba costo di bida?
- Considerando nos dependencia grandi riba turismo: Con Gobierno di Aruba lo atende cu e impacto di e recesion mundial prolonga y aumento di prijsnan local pa loke ta trata e sector turistico?
- Un recesion mundial prolonga lo reduci biahamiento internacional, por causa "layoffs" na aerolineanan y e aerolineanan por reduci nan rutanen: Con gobierno ta anticipa riba e situacion aki pa mitiga posibel impacto riba nos turismo?
- Como minister di economia y sector primario: Kico ta e plan di Gobierno di Aruba pa diversifica nos economia pa reduci e dependencia di importacion di productonan di afo y consecuentemente pa nos tin un economia resiliente y duradero?
- Si considera Aruba ta parti di Reino Hulandes y ta parti di Union Europeo: Kico Gobierno di Aruba ta bay haci pa sigura estabilidad den e relacion comercial entre Aruba y Union Europeo?
- Posiblemente e comerciantenan y negoshinan local lo wordo afecta negativamente pa e aumento di gasto di importacion y lo hisa nan prijs. Ki plan specifico Gobierno di Aruba tin pa proteha e consumidor contra esaki?




Parlamento di Aruba
Fraccion di PPA

-
- Si tene cuenta cu pa hopi tempo caba kier habri e mercadonan den region, p.e. Colombia, Costa Rica: Kico ta status pa por importa comestibel (carni, galinña etc.) for di region? Ki dia lo duna inicio na dicho importacion?

Nos ta spera di haya e contestanan mas pronto posibel y di antemano gradici e gabinete.

Atentamente,



Sr. Otmar Oduber
Lider di Fraccion P.P.A.